

四庫全書

集部

欽定四庫全書

集部
無為集卷一
四

詳校官庶吉士臣何道沖

檢討臣何思鈞覆勘

總校官庶吉士臣朱 鈐

校對官中書臣王鍾泰

謄錄監生臣沈一鶚

欽定四庫全書

集部三

無為集

別集類二 宋

提要

臣等謹案無為集十五卷宋楊傑撰傑字次公無為軍人因自號無為子嘉祐四年進士元豐中歷官禮部員外郎出知潤州除兩江提點刑獄卒于官原序稱侍講楊先生蓋其帶職也傑及與歐陽修王安石蘇軾遊故其

詩雖興象未深而亦頗有規格其率易者近
白居易其學為奇崛如送李辟疆之類者或
偶近盧仝大致則仍元祐體也又及與胡瑗
遊故所學亦頗有根柢官太常時議典禮因
革多所討論集中如補正三禮圖皇族服制
圖諸序以及禘祫明堂樂律諸奏皆有關于
典制但其文才地稍弱邊幅微狹耳集凡賦
二卷詩五卷文八卷紹興癸亥知無為軍趙

士彰所編士彰序云刪除蕪類取有補于教化者若釋道二家詩文則見諸別集今別集不傳故張敦頤六朝事蹟載其雨花臺詩一首王象之輿地紀勝載其淨居寺詩一首潛說友咸淳臨安志載其西湖參寥山房詩一首鐵網珊瑚載其佛日山別長老弼公詩一首凡為僧作者今皆不見于集中也然第五卷中有書寶山寺壁一首第七卷中有題寶

樹院五松一首東峰白雲院一首野寺一首
第十卷中有圓同菴銘一首圓寂菴銘一首
未免自亂其例又如銘五首入禪文贊亦禪
文乃列詩中詩以古體律體分編而和謝判
官宴南樓一首本拗體七言律詩而誤入古
詩編次尤為無緒至于魏詔君贊詔字益避
仁宗嫌名而次卷仍稱魏徵君草堂校讐亦
未盡善惟傑集自南渡以後湮沒不傳士彬

積兩歲之力搜求編次使得復傳至今其表
章之功固亦不可盡沒耳乾隆四十四年七

月恭校上

總纂官

臣紀昀
臣陸錫熊
臣孫士毅

總校官

臣陸費墀

無為集原序

國家以文教作成海內近二百年主上紹開中興息馬
論道者一紀於茲比詔有司修建太學蓋以儒術粉飾
治具漸磨士類未始須臾置也無為在淮右為小壘而
多名士侍講楊先生名傑字次公道號無為子實一時
文人公自妙齡擢魏科以雄文妙賦醇德懿行得名於
時中間立朝議禮樂因革人尤多之晚年嘗奉使過秦
山觀日出於絕頂之上重九日賦詩舉酒於華山蓮花

之峯繼被詔從高麗僧統義天遊前輩以謂皆以王事而得方外之樂故於瞿曇尤造理窟當時如大丞相王公內翰蘇公悉印可之年七十而終生平所著文集湮沒未傳於世吁可惜也歲在重光作噩之冬士黻誤恩假守是邦服膺侍講公之名舊矣視事之初首詢公文於搢紳間歲餘搜獲不一公遣詞典麗立意奧妙因刪除其蕪類取其有補於教化者編次成集將以為學者標準上佐吾君偃武修文之意不其偉歟其詩賦碑記

雜文表啓共分為一十五卷若釋道二家詩文則見諸
別集云紹興癸亥歲夏四月左朝請大夫知無為軍兼
管内勸農營田事趙士彰謹序

欽定四庫全書

無為集卷一

宋 楊傑 撰

古律賦

歸來堂賦 并序

碧虛子陳景元字泰初初入道為右街錄賜號真靖主
中太一宮屢請歸廬山朝廷不從大丞相舒公因真靖
自言而題之云官身有吏責觸事遇嫌猜野性難堪此
廬山歸去來無為子楊傑蓋碧虛子之友也聞而歎曰

昔靖節先生賦歸去來以歸廬山之陽且八百年矣其辭未亡罕有繼其聲者今大丞相因子之言而及之愛子之深也夫靖節遠害於汙俗真靖引分於治朝雖其去不同而所歸則一廼追靖節遺韻而歌歸去來以貽之庶亦自警云

歸去來兮當太平之時胡不歸寵難處而易辱樂或過而生悲田園蕪兮不耨歲月流兮莫追非彼馬而是是我指而非非黼黻爛兮眩吾目塵埃全兮緇吾衣不

收視以返聽將安望乎希微胡為乎疲足孤輪與時競
奔行不顧乎夜漏往取愧乎晨門余聞有其善者善喪
外其身者身存享不俟乎牛鼎酌不假乎象樽內苟適
其志願外何覲乎面顏一簞足以自養一枝得以自安
車善行而無跡門善閉而無關動不離乎輜重超燕處
乎榮觀河汴流兮九曲丹伏鍊兮七還師不陳而坐勝
勇無取乎桓桓歸去來兮請從逍遙之遊委天與之定
分在道外以何求有名教之真樂絕世俗之妄憂玩幾

微於八索鑒福極於九疇齊物我而一致汎忘心之虛
舟躡遺舄於子喬接逸袂於浮丘礪吾齒而漱石清吾
耳而枕流投空谷而響應憩長林而影休幽鳥翔而後
集白雲去而復留歲云暮矣何之叟擊壤以為期捨我
田而營它徒勞力於耘耔子胡不歌大丞相之詩脫官
身之吏責廬山歸去夫何疑

一鶚賦

雄鷲之物
無有儔偶

鶚也惟一物之至雄絕倫類於凡羽銳擊搏於秋風一

飛則沖得路昊穹之表獨立不懼肯羣燕雀之中在氣
稟金於德為義力捕潛伏性鍾猛鷲由耿介以寡合非
沽激而自異雖曰鵜如其狀孰並翱翔未嘗烏合其羣
曲從黨比其或木落萬壑雲沈四陸我則助天地嚴凝
之氣乘風霜肅殺之時鼓雙翼以直上摩九蒼而俯窺
免縱狡以難遁狐雖妖而盡追義可去者力皆擊之此
天下以無雙少而尤貴彼鷲鳥之累百多亦胡為目瑩
星攢爪剛鉤屈飛騰而雄壓鷹隼擒獵而功高網罟宜

乎孔融為表薦禰衡以興辭鄒陽上書諫吳王而託物
大抵物之常者易其侶禽之異者難其儔故我不苟以
合不旅而遊孤飛得以奮其勇離羣不足為之憂惟我
獨清屈大夫之在楚出乎其類孔宣父之生周非不知
生而飛鳴樂乎儔偶奈何彼不我類我匪其醜與其羣
以無益孰若介然自守又何必提提若鸞斯之黨止賊
夫糧嚶嚶為黃鳥之鳴過求其友勿謂毛羽爾盛朋儕
我無殊不知丹鳳巢於阿閣大鵬迷於天隅子可類聚

孰云德孤衆莫希蹤鄙翩翩之六鵬舉難接翼小泛泛之雙鳬噫得其時則架於軒楹失其遇則巢於林藪將伸勇毅之志願假英雄之手如欲禽異類而肅四郊於一鷄乎何有

歌雍徹祭賦

宗廟之祭歌雍以徹

王享於祖禮終以時雍詩所以歌者祭器從而徹之周頌一章擇作永言之用宗廟九獻此為去饌之期成王以貴為一人祀兼七世歲或舉於祠禴時或行於禘禘

且謂盡物盡志者孝子之事有始有卒者聖人之制當
取正聲以尊先帝尸初以入必奏肆以迎尸祭及其終
故歌雍而徹祭詩云至止肅肅有來雍雍祖考我格辟
公我從有眉壽降祥之述節宰夫屏器之容篇本附於
臣工詠而見意時因去其胙俎禮以為恭大抵詩不可
廢廢之則闕祀不可久久之則褻故我就靈宇以行事
揚正音而後徹聲聞於外且非客出之初孝事其先用
作神歸之節豈不以遷其祭器之謂徹播以人聲之謂

歌徹焉造其禮之備歌焉報其福之多以樂為用非雍
則何是以小師教於瞽矇職當諷誦君婦廢其籩豆音
應純和惜哉周運否而大禮衰魯權喪而陪臣侈樂奉
祖廟義同天子雖能享獻以自大莫測聲詩之所以故
孔子謂來助有二王之後始可謳謠奚取於三家之堂
徒彰僭擬則知帝威穆穆上德顯顯詩曲盡於辭意禮
告成於祖宗且異夫率諸侯以祀文頌陳清廟就方丘
而祭地呂奏黃鍾愚嘗因雍什之詠歌求詩人之微妙

以為薦可用於廣牡禘可行於太廟及其徹也又從而聲之為萬世之典要

周兼養老禮賦

兼修三代
養老之禮

古之養老禮莫如周兼三代之常法新一王之令猷尚文德以唱風典章尤盛奉耆年而興教飲食參脩昔自有虞訖於二代必重年德以均仁愛然而禮有質而有文事或興而或廢及周之治也古今之通制兼明而老者養之帝王之餘風盡在大抵燕者虞之禮饗者夏之

儀太牢而食有商所為天下未有遺年者周人修而兼
用之就膠庠以致勤高年畢萃順陰陽而為具異制同
施莫不鼎俎豆籩牲牢酒醴攷四代之異制萃一朝而
為禮貴親尚齒德爵富雖曰殊風黑衣素裳深燕縞雜
然在體至如樂之作也六樂並用學之建也五學相參
而況養庶老而明廣愛事國叟而記高談得不比前世
而文盛優上壽以恩覃尊者艾於每年時凡有七嚴豆
觴於一日事徧其三故得風始朝廷化流穹壤春夏焉

先饗而後燕秋冬焉先食而後饗舜禹湯之盛事得以
追修鄉國學之殊方各隨所養向非歧昌之德盛而大
武發之功肅而嚴成王治定姬公思兼則何以設珍具
以完備致蒸民之仰瞻且異夫禮用四朝記者美魯侯
之盛文同三代史臣推漢德之炎則知兆民莫不親其
親聖人惟能老其老推年齡以優事監古昔而順考孔
子曰周郁郁乎文哉未必不由於此道

不易之地家百畝賦

多少之限
因地豐瘠

歲不易者為美地地所美者善養禾惟君賜萬民之限
凡家無百畝之過田居三壤之先靡虛其種戶給一廛
之廣敢益而多嘗聞田不授則倉廩虛食不足則民人
天故姬周平定則畋頒分億兆然而為土有肥磽出物
有多少利而或偏仁何以表是故再變易者三其地補
生育之所虧不代更者一其夫防兼并之所肇大抵王
錫以土民耕以時衆者不當過而寵寡者不可使之飢
必在計夫家之費辨黍稷之宜以中地給六人之用下

田供五口之資凡同居之七者擇上腴而賜之既殊休
歲之疇常豐所利當限取農之數以授其私勿謂土之
美也爾家不足與之耕勿謂齒之衆也其晦不宜使之
簡況夫任土之法待其政生齒已上書於版所養以之
知所給因而限異漢臣之代則農不定居如楊子之廛
田世為常產蓋夫瘠地之民勞以瘁沃野之俗逸而伸
沃焉至多則太逸其俗瘠焉加少則大勞其民所以上
上之田不廣蒸蒸之利將均虛一歲而虛二年誠非此

類為前朝而為後市數若相因然後再易之間八家所
治內以公田奉於國外以餘夫次其地猶有萊畷六遂
之遠得而優不奪農時數口之飢無以至惜哉運革三
代權分七雄井地一變民田不同或負郭以無仰或連
阡而自豐夫豈知辨野而頒遂師之典彛得正數室而
制司徒之法則從中後之君鑒古是非隨時沿革重益
子之經界鄙秦人之阡陌必也一丘甸以惠斯民損其
豐而益其壻

琴材賦

桐之良者
可以作琴

世有嘉木天鍾至音抱良材而麗地俟哲匠以為琴中
藏山水之聲能參大樂未偶斧斤之手獨秀喬林嶧陽
高峯龍門淵壑純氣所萃奇材以託宣情之具可以制
閑邪之操因而作時未我與工未我度固全天質自為
物以混成安得梓人為發音於寂寞百尺之木特生之
桐落落聳幹亭亭倚空無繁枝以示外蓄太和而在中
時或裁成宜取羲黃之法人能抑按當移鄭衛之風正

聲未揚識之蓋寡庸目雖衆視之或捨猶藏器之哲士
俟掄才之賢者雖云陶令非取意於絃間又恐吳民欲
為薪於爨下俄有智者過而器之且曰堪輿之秀巖谷
之竒激風霰於冬序感雷霆於夏時足以道舜民之樂
足以伸楚客之悲如玉在山祕珪璋之重器猶金藏鑛
屈劍戟之雄姿毓質若然成功非我非鍾山之玉兮其
徽曷稱非園客之絲兮其絃安可將致於用必陳於左
然後欲天下之治者調其音而為表儀有君子之聽焉

平其心而無懈情是材之所稟用難自彰巧之所述器無不良儻工匠見遺不之翦而不之斲枝柯雖茂胡為官而胡為商別有藝藪俊髦儒林綱紀明堂之柱此其選巨川之舟此其擬材乎材乎豈獨琴而已哉冀匠師之明所以

荀揚大醇而小疵賦

周漢運否荀揚教傳雖曰醇之大者亦有疵之小焉皆命世以為文言非不粹與生知而較美道未能全嘗聞

人異禽魚性鍾天地全而稟者曰聖哲偏而得者曰賢
智聖無不通賢有未至是以周公尼父率臻大道之醇
荀况子雲未免纖瑕之累蜀國宗匠齊王老師雖抱重
器不逢盛時欲卷道以自處疾沒世而無知由是簡冊
其蘊瓊瓌爾辭立大功於是矣未盡善者有之著書三
十二篇義差而駁準易八十一首理失而醜至如論性
之淵源談道之極致或曰善惡一而混或曰理義皆其
偽以禮義為偽則堯舜之法歸乎詐以善惡相混則絲

禹之心何以異兩賢於道擇不精而語不詳三子之間
得其一而失其二又若對臨武以問兵之術推子淵以
希聖之徒遠罪特愚於鼃錯談經私美於童烏是所謂
珠不無類瑕無掩瑜雖無傷於大義實有累於名儒非
倡道之子思將何以教美不臣之新室幾近於誣向使
親承鄒魯之範模獲偶淵騫而論討然後善得以盡辨
無不早數萬言皆造修途千百世以為至寶雜乎其雜
當殊太史之書醇乎其醇可擬孟軻之道奈何智有失

慮人無全能一則晦名於天祿一則朽骨於蘭陵俱有
篆雕之雜難全粹美之稱亦猶務涉獵者賈山醇儒不
足悅紛華者子夏具體何曾噫荀也倡之於前揚也和
之於後助詩書禮樂之化謹父子君臣之守斯文未喪
大疵則否何韓愈氏重而責之蓋責賢人也厚

無為集卷一

欽定四庫全書

無爲集卷二

宋 楊傑 撰

律賦

五六天地之中合賦

奇偶相合
茲得中正

樸散太極形分兩儀天五得其中也地六從而合之數
各有常法乾健而坤順位皆處正併陰偶於陽奇聖人
述易幾微窮神高厚以謂地自二以至十天始一而終
九數相協而運行義故得而悠久凡十有一畢乎道其

道皆然惟五與六合而中以中為偶大抵一闢一闔五
柔五剛八與三而契會四暨九以更相亦皆助生成於
品彙廣變化於無疆胡為數之五六獨合體於中央蓋夫
共播日辰日有甲而辰有子協為聲律聲上宮而律上
黃以中中其不中以正正其不正上全真宰之化下遂
羣靈之命氣降為味陶然覆載之間民受而生賦以中
和之性是所謂象有滋滋有數窮則變變則通名數本
堪輿之用交通為造化之功設在衆甫合夫大中二氣

始分類本從於三兩五位相得獨無黨於初終後世商
建五官周分六職經有五典士敦六德豈非取法於高
卑然後鑒人之失得觀而作服可為色以為章叙以成
疇故曰福而曰極定數若此至神在茲既可推以造歷
又可準以揲蓍亦猶三五異位而同功孔子述卦爻之
義一六共宗而在北揚雄明首贊之辭則知地數雜而
不純天數純而不雜物理深蘊歲功周匝就五十有五
之中五六謂之中合

導河積石賦

導河施功
始於積石

堯末遇水禹先導河俾乂中邦之害必由積石之阿疏
經瀆之橫流圖成茂烈自金城之巨鎮下決餘波昔者
世病懷襄人思降宅天命神聖力平川澤悼父績之湮
淪窮水源而疏闢且謂為民之患患莫大於洪河而治
水之功功宜先於積石北越降水東踰大伾或穿地以
湍悍或鑿山之嶮巖流不自注功由此施昔也出圖天
嘗授於義氏茲焉興復山必始於龍支況夫江已決於

岷山洛已疏於熊耳矧此至大尤當謀始故我因水徑
道以山綱紀成其功於十三年歷其地之三千里流未
入於北海思是用勞勢必就於西平勲由此起或謂禹
績雖大河源未窮殊不知出崑崙以湍激至蒲昌而會
同皆在塞外或潛地中不為吾俗之所患故自此山而
起功靈派至長蔥嶺于闐分為二聖人經始西傾朱圉
在其東宜其海宇砥平勲庸日積治雍州以云備入冀
都而建白樞以過於大陸遇此洪波浮而至於龍門告

其成績有生乃粒無患其魚大功可謂至矣後世何以加於亦猶引渭會涇由鳥鼠而基兆䟽淮入海自桐柏以權輿惜哉聖去邈遼民煩䟽導既禹跡以湮塞徒漢歌之嗟悼胡不訪名儒而修水官講究夏書之典

能賦可以為大夫賦

因物能賦
可為大夫

鄰國交好古人重詩苟賢者之能賦故大夫之可為感物造端致二邦之協睦量材錄德宜再命以優推嘗聞侯以賢封土由君胙鄰邦不可以不睦臣職不宜乎不

具將與謀事必求能賦且詩有六義能宣列國之誠而
智效一官當預大夫之數蓋夫善比而興能箴以懲適
四方則命無所辱善一言則邦從以興既達古之風雅
可為君之股肱誦三百之遺篇足彰才智宜五十而後
爵以寵賢能及其受命出疆從君與會講好以修睦興
利而除害我則文寄其心聲聞於外揚四始以深諭為
二邦之所賴是以班固之言圖事諭志居先盧愷之議
審官語詩為大則知道佐列辟尊為大夫祿不可過爵

不可踰苟弗善其詩者豈足謂之賢乎必也鴻鴈應機
可任歸生之職羔裘善誦是為子產之徒況夫主意淵
深國幾叢脞託章什以後達非賢才而安可詩人之詩
諷而誦義已精窮祿士之祿倍而兼材當克荷故聖人
著育才之法正取士之因以謂官欲入者學於古夏所
誦者弦於春就宵雅以肄三始從師氏及君子之能九
進任陪臣後世詩道陵夷聖言湮鬱義失風賦文煩黼
黻學之不足以事君詠之不能乎託物然而位或至於

公卿得無愧於簪紱

深衣可以為文武賦

服深衣者可為文武

先王蓋有法服古者謂之深衣惟聖賢之被體為文武以圖徽中規矩而應權衡飾身以禮可擯相而治軍旅助德而威嘗聞服不妄成義有所主或專用於朝聘或止臨於仕伍獨此深衣創從先古約之以法毋被土而毋見膚服也在人可以不文而可為武自天子之貴及庶人之卑所純則異隨時以為實善衣之亞者俟兼材而

副之應六二爻得正義直方之節行三千禮盡干戈揖讓之儀其布十有五升其裳十有二幅用之燕饗燕饗協用之師田師田肅念養老之虞氏昔嘗在躬非學道之仲尼孰能稱服大抵衮衣非不華也不得施於武黼裘非不威也不足用於文兼爾適用此其不羣既可次於六服又是率於三軍設五法者聖人昭然有制持二柄於天下衣以成勲則知賓主昭其信誠師旅奮其剛果將者尚其右相者處其左則必服有制度然後人無

懈惰兼高下短長之法義各有歸衆會同征伐之間施
無不可故曰足以澣濯服而邃深可秉威而章化能安
志以平心亦猶委貌者田獵之冠燕臣亦用鷩冕為饗
射之服祭事其任後之人文不足以經邦武不足以衛
社盛服雖被成能蓋寡噫得無愧於深衣不賢而識其
小者

繼別為宗賦

君之別子
繼者為宗

諸侯之庶謂之別別子之適謂之宗欲正世以相繼惡

羣心之異從惟君弟之初生法當似續致族人之仰事
禮盡寅恭古者列侯先正其裔凡立厥次乃莫而世則
斯子也君夫人以為母必有弟也卿大夫以同制宰乎
爾族為始祖以優崇適曰大宗庶後昆之承繼嗣既云
立禮無不司如親疏之升降昭穆之尊卑吉凶之容節
昏冠之威儀族所為者吾皆主之職在成家紹一宗之
本始代相纂服豈百世以遷移亦有自異國以肇臻與
是邦而同列既處其土因謂之別亦自命其來裔嫡嫡

相仍得兼綜於小宗承承不絕大抵綱之舉則綱不得而亂表之正則影無從而欺欲家邑之咸入捨宗子以何為豈不見魯國三桓立其長而統其下鄭人七族建其本而率其支是知別者別也父別異於侯氏宗者尊也已尊優於冑子以纂其德以紹其美考之書無作室之誚在乎易盡克家之理彼於國而食采肇啓封疆此以族而得民嗣承綱紀夫然則仰繼公子上尊國君正統得以全其貴同姓無以亂其羣且異夫三從事之以

稱宗易於後世庶子賤而不為長載在前文孰若我在九族而貴之稱五宗之上者無忝父德克寧家社故曰繼其祖者傳代不遷重其統也

籍田居少陽之地賦

天子之籍
居地少陽

位各有法籍無妄為實聖人之耕者宜少陽以居之建王社於田中因時以享就春方於國外順氣之施蓋夫追養祖宗告虔天地酒齊以之薦粢盛以之備故凡建國之先必擇為田之次然而制度不同方隅相異在周

人之盛世嘗處南郊至唐帝之昌期變居東位其意若
曰地播生氣時從少陽土因而沃物得而昌此旣興於
王藉吾可實於神倉是故廣闢農疇用作躬耕之所仰
參乾道式當歲起之方時或晨見農祥日躔天廟則必
朝士謹司徒之戒王者納稷官之詔命載耜以勤勞率
就田之壯少東作以禮自符虞帝之書壇置於郊何愧
孔生之誚胡不居於北者惡其就嚴凝之地胡不居於
西者惡其專肅殺之權就嚴凝則莫繁其稼專肅殺則

徒事於田曷若我地乘於震氣順於天啓千畝於王畿
壤稱其奧遵五行之木德位據其偏是所謂假力於人
名田為藉因先聖而有建非後王之能易禮殊西漢賈
生不必獻其言時在陶唐羲仲可以兼而宅夫然後天
下之農不敢以怠諸侯之養不得而疏自我良疇之廣
據茲盛德之初亦猶王所處之明堂國陽以立臣所興
之小學宮左而居厥後政失紀綱君輕耒耜上既逐於
晏逸下亦忘於耘耔宜國家舉盛典以興藉田繼有唐

之天子

無為集卷二

欽定四庫全書

無為集卷三

宋 楊傑 撰

古詩

幽谷吟上歐陽內翰

滁山插空望不足行信馬蹄入幽谷生平未慣塵外遊
先酌寒溪洗塵目自疑身是武陵客誤逐桃花迷水曲
欲窮本始問歲月亭上雄文鑿青玉意高語險測難到
拂散白雲再三讀乃知造作自混沌山神固護寶藏匱

欽定四庫全書

路歧未許車馬通白日蒼煙走麋鹿一從紫府仙人來
指出洞天三十六膏澤疏開不死泉棟梁養成歲寒木
靈苗異草無根株搖蕩清香過林麓峯巒圍匝別是天
天在山中成大畜先生之心此其象往行前言深蘊蓄
議論吐為仁義辭文章散作生靈福默笑真工功未醇
餌飮春風美紅綠聃云谷得一以盈以一能應無窮聲
千古萬古聲不盡先生得之為聲名公之聲名公之心
日益遠大日益深愚儒耳目所不及奮筆空成幽谷吟

辟雍硯上胡先生

媯皇鍛鍊補天石天完餘石人間擲擲向淮山山下溪
千古萬古無人識畫出白雲籠九州夜吐長虹籠太極
去年臘月谿水枯色奪江頭數峯碧野夫採得琢為硯
一畫中規外方直方直端平象地形形壅水流流若壁
擬法辟雍天子學不比類宮一隅塞幸遇先生掌辟雍
持以獻誠安敢惜欲伐東山五大夫受爵非材鍊為墨
欲乞湘妃血淚竿刮削除斑供簡策欲就退之借毛穎

同與先生記心畫先生記之何所先探蹟聖賢詮六籍
四時七政有未平願述陰陽修律厯要荒流蔡有未賓
願據雄略操軍檄辟雍之水流不窮先生之材無不通
願攜此硯飛九穹圓潤化筆扶天工

屏石謠贈郭功父

屏石屏石何嶄巖云初得自江之南沙埋土蝕幾千載
無人辨別嗟沈淹淨空居士物鑒精獲之不貴黃金兼
清泉洗滌露真璞野雲凝結堆濃藍巫峽山前暮雨霽

參差十二挑峯尖比干骨朽心不朽通竅至今存四三
蜂房蟻垤豈足數或疎或密爭欹嵌銅臺古研置其下
一片皴碧沈寒潭唐朝牛公嗜怪石取之不已其亦貪
爭如夫君一勝百得此自足無傷廉我嘗乘醉到君家
臨風叩以蒼玉簪其聲清越合律呂莫簾可與大樂參
何當琢磨中勾股列為編磬歌雲咸問君考擊薦郊廟
孰若藏在青山庵

潛山行

金匱要略卷三
昔年曾稽探禹書探得六甲開山圖圖載潛南天柱山
上侵霄漢下淵泉真人祕語世不傳但見絕頂蒙雲煙
漢武射蛟浮九江舳艫千里來樅陽築壇祈仙瞻杳茫
茂陵檜柏空青蒼石牛一卧叱不起白鹿還歸深洞裏
二月靈鶴有時來洞口桃花泛流水

歌白雪 二章

歌白雪雪滿龍沙暮冬月萬里征人歸未歸一聲曉角
雲中咽

歌白雪雪壓樵夫樵擔折行到都門門欲開十二玉樓
歌未徹

勿去草

勿去草草無惡若比世俗俗浮薄君不見長安公卿家
公卿盛時客如麻公卿去後門無車唯有芳草年年加
又不見千里萬里江湖濱觸目淒淒無故人惟有芳草
隨車輪一日還舊居門前草先除草於主人實無負主
人於草宜何如草無惡若比世俗俗浮薄

古行路

古行路古行路今人欲追古人去古人去遠何可追後
人視今如古時君不見去年春風去已久今年春風亦
依舊

和酬子瞻內翰贈行長篇

雲濤擁開滄海門鼓輦萬疊鳴江村仙翁引我峯頂望
耳目震駭難窮源黃金鑄鯨為酒樽桂漿透徹冰雪盆
吳歌楚舞屏不用夾道青玉排雲根經綸事業重家世

昔聞父子今季昆九丹煉就鼎竈溫刀圭足以齊乾坤
我行欲別湖山去為我索筆書長言照乘不假明月珠
自有光焰生輶軒

和章學士祈晴昭亭山

洪範八政一曰食民非稼穡胡為生江南風俗重圩垸
歲遇豐稔倉箱盈嘉祐六年宛陵郡積月霖雨妨秋成
昔之鬱鬱若雲秀今也汎汎猶青萍豈惟百姓失所望
將恐祭祀無染盛集仙到郡為憫惻齋心命駕祈昭亭

昭亭山下欲回轍太陽赫赫輝雙旌老農乘時得刈穫
清風和氣謳歌聲我知夫子禱已久由有盛德通神明
願公移此福天下陰陽調燮歸和羹

五雲叟琴閣

朝望五雲山暮望五雲山望之欲去未得去抱琴登閣
聊怡顏琴聲噴潺湲意在山之泉琴聲險欲絕意在山
之巔五雲之山不須到勸君但作五雲操

凌歊臺

大明七年暮冬月宋武南巡立雙闕鑾輿先幸凌歊臺
雲中簫鼓轟春雷六龍一去杳無迹山花野鳥空相憶
翠羽鳴鞭來不來景陵芳草年年碧

景雲軒

南城城外山崔嵬景雲軒上無塵埃雙溪水落逐年急
白髮僧歸何日來畫屏滿目萬瓦合幾人到此心如灰
恭軒

春雷驚起蒼龍角春風擺開紫雲籜掃斷紅塵不得來

翠羽旌幢擁高閣高堂老人年八十朱衣省郎侍旁立
追懷手植先大夫栽培灌溉既何勤劬濃陰潛蔽芝蘭徑
美實飽供鸞鳳雛幽軒得名名曰恭見此還與桑梓同
豈惟雪霜不可改年年高節搖清風

留春亭

古今春過知多少人不留春頭白早君欲留春心可知
為君更賦留春詩留春莫只留花住花老春風亦隨去
孰若芝蘭香不歇亭下長如二三月

滄浪亭

滄浪之歌因屈平子美為立滄浪亭亭中學士逐日醉
澤畔大夫千古醒醉醒今古彼自異蘇詩不愧離騷經

送陳資道

有客抱荆璞不琢貴其質兢兢三十年常恐有墜失所
欲價百倍今也十之一勿患知者難光彩已四出

古鑑謠

鐵鑑埋重泉知經幾寒暑山翁築春田得之南澗許磨

刮追光輝雲卷秋蟾吐斂衽正面視歷落露心府壞垣
試一照陰靈吼風雨我欲匣此鑑西上獻人主不願鑑
其鑑願君鑑於古桀紂不鑑古基業傾湯禹幽厲不鑑
古綱紀頽文武吾皇寶其鑑清風塞寰宇

豫章行送周裕

君不見南浦亭前草送人千里道一番膏雨一番青不
顧王孫江外老又不見豐城劍埋塵土間幾年秋水澄
波瀾夜深直氣射斗斗變化風雷頭角寒丈夫窮通有

時有滿腹詩書滿樽酒行行三月到揚州故人莫笑麻
衣舊

和穆父待制蓬萊觀雪

戊辰歲歷長兩春一逢臘上瑞兆豐年同雲彌六合初
如天馬來奔入銀河蹋梁苑客後至郢樓曲難答錦繡
方還里罇壘喜開閤光照孫康書寒恤袁安榻但愛川
陸平不問瑤珉雜扁舟欲泛剡凜氣若浮漂龍圖屢烹
試風腋頓爽颯明月交清輝絳籠不燃蠟

贈朱伯原

張籍心不盲何為盲於目伯原道不病今也病在足及
第二十年未識太倉粟樂圃德義重可敵萬鍾祿世味
覺幻夢老把華嚴讀九會發淵微贊文煥珠玉洞庭秋
月澄吳門春草綠香海泛虛舟不懼魚龍觸

凌雲行

淮國耕釣夫素嗜山川樂補吏來盱江潛解藍綬縛獨
上凌雲亭青梯入寥廓萬象富觀覽面面峻巖壑天風

襲衣襟綵霞半空落仙家雞犬鳴驚起巢松鶴勝遊最
後時萍梗念飄泊回首顧人間紅塵滿城郭

無為集卷三

欽定四庫全書

無為集卷四

宋 楊傑 撰

古詩

豐湖歌

惠州風土隔世埃使我南望長徘徊昔年霹靂轟蓬萊
六鼇踉蹌海面開一峯崒岼九霄落萬里怒濤推擁來
至今浮在羅山畔玉閣石梁挿天半世人可見莫可登
雪棧雲梯知幾層近聞更有豐湖好環匝亭臺映洲島

野叟忘機鷗鷺閒寒潭無浪蛟龍老雲歸洞府月滿灣
客卷綸車魚在藻白玉抽苗萬蓋圓翠光期壓王孫草
天高日暖荔枝香風撼一川紅瑪瑙主人丹鼎飛金虎
豐湖無根豈能住一日地軸如走丸隨逐浮山還舊處

謝公約惠墨竹圖

幽人漬墨寫成竹變化琅玕作玄玉公約贈我兩大軸
不比丹青凡草木六月都城苦炎燠車馬紛紛正馳逐
曲臺官冷晝掩闥淨掃虛堂展霜幅簾間忽有微風來

不動纖枝清滿屋憶得扁舟載雪時曾寄會稽江上宿
和謝判官宴南樓

邂逅南軒須水濱名言間發蘭桂芬道義相投有餘樂
賓主交照無繁文忠臣寤寐在北闕古風歌詠追南薰
出關不覺行役苦舉頭時見孤飛雲

送李辟疆

李辟疆濡須別我遊池陽別後不得信不覺青女三飛
霜每見世俗仇讎盃觴桎梏文章憶君酒怪吟狂往往

登高崗但見大江水茫茫九華峯青蒼使我增悲傷明
堂禮後一百二十日忽騎蹇驢訪我來池陽倒覆我巾
箱得我葵藁數十張索我狂書八九行告我明日遊帝
鄉我知利民術君心十年藏青雲一萬里此去高翱翔

白月池

鑿池待明月池成月自來一從幽人去明月來幾回乳
竇走龍蛇斷崖激瓊環安得藉磐石泛我瘦木杯

留題張尉隱齋

小隱隱林藪大隱隱朝市市朝心隱不隱身山林未必
忘名利夜來月明竹聲細隱齋主人留客醉四更客未
醒主人促車騎客笑主人勞不顧隱之意君不見梅福
曾作尉民官莊周亦為漆園吏

酒隱園

小隱隱山林大隱隱城郭城郭多紛囂山林苦淡薄不
如隱於酒適意自斟酌屈原不能飲獨醒較清濁揚雄
雖願隱載醪無適莫吏部甕下卧其隱可愧忤翰林市

上眠其隱太落拓孰若畸翁園醺酣得大樂風暖鳳凰
集霜重梧桐落長嘯待明月明月出林薄倚杖傲浮雲
浮雲度寥廓雖近市朝路不為名利縛知我尚幽勝賦
詩豫期約願言醉鄉遊一駕東飛鶴上池沃瑤漿沖氣
溢金杓當知隱君子志不在糟粕

及第東歸逢元舉

與君去歲金陵遊七月十日離楚州酒闌浩歌古亭下
白日雷雨催行舟片帆乘風破險浪冉冉飛過蘆花洲

我時幸預鰲頭薦君以才術公卿留人生聚散散或聚
忽忽今會如萍浮君行何以贈君別莊鵬九萬搏高秋

丞相王舒公贊

天子元老坐而論道赫赫具瞻傳巖惟肖

都尉王居士贊

珠圓而明玉澤而溫鑑瑩澈而絕塵芝秀發而非根曼
殊沙華梅檀香芬晦堂路險大開施門西江水深一口
平吞誰知威音已前正是王老師孫

三江魯府君贊

三江府君有德有文善政及物陰功惠民異木連理雙
芝共根詩助風教道傳子孫斯人一去莫可見萬里西
山空白雲

治平三年秋七月當塗郭功父招無為楊次公
會於環峯時五雲叟陳德孚以詩寄吾二人
因聯句酬之

空山坐寥落足馬邀俊哲入門肆高談清風掃煩熱

功父

憶昔治平年姑熟溪上別歲時激箭急倏忽三十月

公次

讀書非少銳欲論先卷舌歸田殊未成累累逐羈紲

父功

孰謂趙魏老不能佐滕薛由來歲大寒松柏見孤節

公次

朋心久愈至忠規補殘缺兒童喜父執釘鉾成羅列

父功

壺有玉泉酒庖有冰裙鼈野茨剖珠璣秋瓜咀霜雪

公次

新粳刈且舂香炊軟三浙放七聊醉飽百憂旋磨滅

父功

升平擊堯壤險怪探禹穴吐氣直虹霓落筆淬金鐵

公次

詞源河漢翻俯視隄防決文章貴天成追琢譏竄竊

父功

抵掌萬古事高下爭螳埴挹酌華陽水蕩滌塵土咽

公次

吾心了何染本理忘巧拙聖賢久不作情偽愈分別

公功

竹陰卧片石浩歌聲欲闌山童修及門喜音屈高潔

公次

傳聞脫世累天境妙搜抉疎簾卷危閣九峯青嵒嶮

公功

吟餘琴一弄鏗然響環玦老鶴不敢鳴十里飛雲絕

公次

次公君素交嗟予尚契濶疇能枉籃輿相期出寥次

公功

崔仲岳隱居松江以丹白黑飾舟曰鶴舟括蒼

周子韶無為楊次公治平三年夏六月會仲

岳於繁昌蓬萊亭勉其罷鶴舟以應書席上
聯句送之

且就飛龍榜休登白鶴舟

子韶

隴書方勸駕閭苑莫回頭

次公

丹頂歸滄海霜翎擲素秋

子韶

海鵬期變化仙驥任沈

浮

次公

煙月閒三島功名重五侯須知馳鳳詔便是釣鰲

鈎

子韶

已得沖天便無思擊楫遊

次公

楚醪鏗逸韻湘瑟助

冥搜

子韶

南浦成春別北山空夜愁九臯聞象魏一葉寄

汀洲

次公

世氣騎風虎機心走海鷗

子韶

昔年嗟鷁退今日

並麟遊

次公

八月仙槎駛千齡聖運優市朝真大隱箕顓

謾清流

子韶

鼓枻雖漁父乘桴笑仲由片帆從此卷舊覽

亦應留

次公

冠珮重華國鶯花四皓樓雄文高鴈塔大醉

憶蓬丘

子韶

勲若書青史幢須建碧油蘭橈好重舉乘取

上揚州

次公

送沈漢卿拜母墓

效孟體

慈母塚前柏孝子眼中血根在葉長青恩深淚難歇二

月黃鶯鳴一路玄猿咽

牛渚磯修水府祠并序

牛渚磯在太平州之北里即溫嶠燃犀之所也石岸險
隘江流湍激頗為舟楫之害中有水府祠南唐保大年
封其神以王號國朝祥符中從而加封舟人將過之必
先陸走具牲幣以禱焉及慶厯初朝命開新河於磯後
而獲安濟則禮事稍損祠宇多敝嘉祐七年章太守命
修之傑因賦之且警來者


牛渚磯大江涵涵山險巖舟人欲渡不敢渡烹牲投簡

先禱祈自從疏派得安濟禱者漸踈祠宇隳我聞鬼神
若君子不以風濤為福威吁嗟人心自險易昔也兢兢
今也違太守修祠豈無意寄語安者毋忘危

至游堂

人孰不好游外物常求備佳勝窮山海紛華樂朝市不
知務內觀未得游之至達士靡窺牖天道已昭熾六合
極周流萬化覽要會瀟灑須川守名堂慕高致政清民
訟簡庭木交蒼翠間闌林鳥鳴跳躍池魚戲逍遙成詠

歌吏隱欣得地視聽與人同
所適與人異翻笑列禦寇
不出終身愧吾亦愛吾廬
豈獨壺丘氏



無為集卷四

欽定四庫全書

集部

無為集卷五至八

詳校官庶吉士臣何道沖

檢討臣何思鈞覆勘

總校官庶吉士臣朱 鈐

校對官中書臣王鍾泰

謄錄監生臣沈一諤

欽定四庫全書

無為集卷五

宋 楊傑 撰

律詩

元會

歲令春為首人君德體元宸居太極殿星拱紫微垣
厯運千齡協梯航萬里奔同時稟正朔大號一乾坤
謀野曾縣最沿波未滌源典章歸獨斷期會肅常尊
禮樂諧虞舜師儒陋叔孫曲臺司肄習執法糾譁
諠舊史精窮

討非經不引援殊疆今輻輳古轍此還轅陞峻黃麾建
旗張直蓋屯地圖包海畫庭燎徹宵燭班位分賢戚銅
璣定曉昏仙盤凝沆瀣禁漏瀉潺湲呼旦傳雞唱填街
列虎賁六軍衣錦繡八駿轡璵璠綬采由官別冠梁以
秩論國容修鹵簿武事設橐鞬鼓吹依宮架關扃闢路
門簾文雕猛鷲路飾繡螭蛻牙琢中嚴版珠聯告止旂
金牀置符寶土貢雜瑤琨百辟稽名實諸王固屏藩立
墀隆輔弼述職簡要畚省寺興頽敝材能慎選掄班齊

序鸞鸞仗轉駭鯨鯢主鎮唐儀易袍紗漢制存鞘鳴龍
扇合簾卷獸煙噴陟降天威重顒昂玉色溫泰平安可
象造化本何言悅豫陰陽盛淵深宇宙吞江河宗渤海
山岳望崑崙牘奏龜麟應書先稼穡繁歷階臣委佩宣
詔使臨軒進有稱觴慶初無解劒煩南山賦周雅北斗
揖堯樽濟濟華夷抃雍雍信義惇登歌形瑞物旅舞異
黎園翠鳳聞簫集朱熊負案蹲四清備鐘磬二律下匏
塤寵錫需雲澤均霑湛露恩拜吟三夏享饗盛九牢殄

受釐充醇醴加肴飫熟踏摯勤供鴈雉羞潔具蘋蘩布
治從丹闕懷仁感陸渾祥光騰廣坐和氣冒陳根蓬島
風長習扶桑日向暄前楹秀芝草阿閣長鷦鷯社稷生
靈福邦家政教敦年年朝溥率基業壯中原

景靈宮

仙宗司玉厯帝系出璇霄功業超千載威靈會六朝聖
孫嚴子事神武耀文昭游渭衣冠在遼顏咫尺遙奉安
先上衮守衛肅中貂重屋華天篆樞星屏俗囂麾幢迎

寶輦象魏起祥飈霞醴充流瓚芝房陋煇蕭降升瞻穆
穆馨歆聽寥寥複道悲追漢靈旗想伐遼薦新隨四孟
觀德序三昭養慕諧虞氏聲明格有苗庭分五行舞樂
奏九成簫將相旌遺烈松筠鑒後彫宵巖非特說畫閣
豈惟喬寰海名王聚江湖王氣銷基圖傳久大宮闕壯
嶢嶢皇澤彌霽霈羣生荷益饒侍祠叨旅進賡頌仰材
翹孝治光青史瓊瑤合琢雕

皇帝朝獻景靈宮天元殿門有靈芝為瑞時備

員博士前道聖駕得預瞻仰獲綴賀班賦詩

上進

原廟躬朝獻高真監孝思
僊源傳寶厯乾戶產金芝
火德資生毓天元固本支
靈華依玉宇瑞物陋銅池
大慶同榮茂甘泉殺等夷
洪休均草木嘉應在仁慈
舜舉重瞳目堯開八采眉
祥光齋殿照喜氣輔臣知
三秀書圖牒千齡保福禧
願如郊祀樂志府播聲詩

過黃陵廟

黃陵二妃廟客過動愁顏湘水有時盡帝車何日還
斑千畝竹魂斷九疑山欲問蒼梧事白雲生棟間

李翰林祠

半醒半醉遊南國浮利浮名重一毛天上星精鍾太白
人間文格埒風騷仙翁曾換金龜酒老筆空傳紫兔毫
姑熟遺音千古在長隨春色滿林臯

簡寂陸先生祠

紫霄峰下陸先生飛出紅塵鶴羽輕高第不知朝玉闕

舊山重喜見霓旌斗壇石凝雲三尺丹井泉寒月一泓
昨夜全家宿琳館尚疑雞犬有遺聲

延陵季子廟

戰國干戈禮義隳延陵高節救周衰當時若嗣諸侯統
後世誰傳十字碑生死不欺留劒約興亡都在審音知
名儒如欲修前史列傳應須次伯夷

和伯瞻郎中登郡城北樓

樓上高吟思入微白雲隨步拂人衣幾行塞鴈斷不斷

千里客帆歸未歸
倉廩稻梁知國富
弟兄疆境樂家肥
望中孰謂長安遠
路去江南只數圻

和程太卿雨中登物華樓

澤國連朝雨
春山半夜雷
登樓寒食近
隔岸畫屏開
沙鳥飛還止
漁舟去復來
年年南浦草
相伴綠波迴

夏日天慶觀水閣

錦繡堤邊曲徑通
登臨不覺俗愁空
聲喧枕簟芭蕉雨
香撲罇罍菡萏風
池景信皆塵外
物道家疑在畫圖中

南樓有客頻回首應認蓬萊第幾宮

題具區閣

閣占具區澤登臨萬象奇中秋月明夜平旦日生時雲
淡雪千里水澄天四垂漁舟何處在一笛順風吹

子隱臺

平西義戰幾百載江左空遺子隱臺鄉俗尚傳三害去
地基曾見六朝來人隨逝水年年遠山似屏風面面開
誰與宜興尋舊宅至今藏在白雲堆

余卿新第

章水營居不日成
皇華詩價敵連城
簷牙雨過千鱗碧
池面風開一鑑清
脩竹短牆儒者宅
白頭青眼故人情
莫憂退處生涯薄
鶴引新雛遠砌行

和酬子中舍人

待次歸來偃月城
鄰公笑我拙謀生
藏書有穴期傳世
負郭無田不問耕
朝市風波誰弄險
江湖魚鳥自忘情
吳門建第君何晚
水閣山齋到便成

榮老堂

知節能全節辭榮老更榮閒居玩圖史得意傲公卿自
有琴藏匣何須金滿籬子孫承義訓力學重清名

和穆父待制竹堂

會稽風土竹相宜傍竹為堂趣自奇內史舊居經幾代
此君高節似當時林無暑氣客頻到笋過鄰牆僧不知
莫夾桃花引蜂蝶實成須與鳳凰期

清軒

湖水山一色湖山屏四圍無風自瀟洒有月更光輝洗
滌塵埃靜消磨暑氣微平生方外樂到此欲忘歸

浮玉僧建亭蒜山之頂丹陽新舊太守林子中
楊次公首登之因名二翁亭

來陪杖屨躡孤峯故老旁觀歎二翁海上波平千里白
江東兵壯萬旗紅雲開雲合山頭月潮落潮生渡口風
須約蒙莊老仙客凭欄直下看龍宮

折柳亭和林子中

行人折柳楚江頭
帆去帆來幾日休
飛絮不知漂泊苦
展眉誰顧別離愁
五株彭澤清風在
千里隋隄勝氣浮
莫惜一枝臨水贈
使君將解濟川舟

淮陰千金亭

良將未得用
幾人能賞音
恩難忘一飯
報肯惜千金
舊俗喜出勝
後時空愧心
至今重風義
廟食配淮陰

玩鞭亭

晉祚衰微鼎欲遷
夢驚營壘日回旋
強臣駕馭無長策

追騎留連有寶鞭
險捋虎鬚曾幸免
怒形蜂目亦徒然
誰能杖屨平兇亂
千古荒城鎖暮煙

同浩然正叔賦夏英公宅延春亭得登字

九衢塵土袞車聲
一到延春世慮澄
暖律解教寒谷變
熙臺還許衆人登
蘭生舊砌香連續
花入名園價益增
莫笑冷官聯騎過
長安城裏有誰曾

和晚登故豐門

故豐門近子真家
樓上高吟水齒牙
帆似馬來思杜牧

卷五
劍為龍去憶張華溝還故道穿城角沙漲平川壓水涯
江外西山銜落日幾重蒼翠襯餘霞

張司封泗上春運

經綸才術致唐虞暫出東南摠轉輸德教久為諸郡法
國家何止十年儲清風繼世留淮甸和氣先春入汴渠
不日召歸調鼎鼐一封天上紫泥書

遊北山

今古忙忙利祿間幾人能此叩松關猿驚鶴怨不知處

虎踞龍蟠空見山芳草路隨流水遠老僧心共白雲閒
淮南舊隱拋離久一誦移文一愧顏

書寶山寺壁

片帆曾渡謝家洲屈指於今十九秋沙鳥重歸迷戰島
釣磯空在憶浮丘蒼顏白髮生新感疎竹清風伴雋遊
借問蓬萊山上月停杯還記故人不

遊寶林招李簿梅尉

東郭乞求聞曉雞籃輿乘興過涇谿水開波面白玉碎

雪壓竹梢青鳳低仙去空留鍊丹井境清疑有辟塵犀
子真太白曾孫在飛棹何妨到水西

御試求遺書於天下

炎德侔三代文章歎燼餘千金期重賞諸郡購遺書東
魯藏經出西秦挾律除儒生搜簡畢謁者驚軒車闕史
修蘭省亡詩補石渠願觀新四部清禁直明廬

無為集卷五

欽定四庫全書

無為集卷六

宋 楊傑 撰

律詩

送張令同年赴嶺南

滕王閣上正持盃
候吏先期過嶺來
澤國暫拋三徑菊
春風須寄一枝梅
昔年身到仁宗殿
同日鱗驚禹穴雷
萬里青雲有前約
莫因藍綬歎塵埃

劉純之以便親請還蜀

通守臨川郡家山夢翠微願辭靈運史欲著老萊衣萬
事樽前盡片心天外歸金烏伴征棹日日向西飛

賦梅送黃庭方

子行何所贈贈子一枝梅長共雪霜約故先桃李開清
香隔年在和氣引春回上國人相問為言南嶺來

贈朱漢臣先生

德義輕軒冕有誰知所存清風滿淮國高節老巢門孝
友敦兄弟詩書教子孫何當對明月林下接君言

送陳成伯學士知湖州

揚舲初出禁城東，夾岸桃花蕊正紅。
紫綬朱轡金馬客，清風明月水晶宮。
畫衣始信歸鄉貴，夜鶴從教恨帳空。
政暇笙歌應鼎沸，詩壇不用苦爭功。

送姜厚兄弟

之子別庭闈，鄉心夜夜飛。
芝蘭經歲老，鴻鴈傍春歸。
芳草隨征棹，和風上綵衣。
鳴榔聲漸遠，月滿釣魚磯。

送許常

連年去鄉國從我赴南官一日學不廢雙親心自寬
朝廷尚公正場屋進孤寒去去勿隕獲青雲翔羽翰

和朝回二首

官閒無謁禁朝退自賓稀開卷逢先覺忘言接上機
百千三昧悟四十九年非老矣陶彭澤浩歌胡不歸

氣平無病惱心定覺身閒禮局容尸素仙科玷潤刪
馬驚猶勉駕鳥倦合知還舊隱廬山下蓬茅屋數間

和酬致政朱殿丞

桂冠清世詠歸田舟縱江湖養浩然水底病龍思致雨
樹頭老鶴懶冲天詩因社友編三百酒為春風費十千
今古辭榮人不少惟君知足最當年

再和

詩將曾持造化權何須功業勒燕然生涯書外都無物
興味壺中別有天君解扁舟帆五兩我慙佳客履三千
吾皇貴老多優賜好乞湖山不計年

再和

君賦江山數十篇人疑吟苦鬢皤然洞庭有浪寒欺畫
太華無雲翠挿天鷲鳥懦飛徒累百疲兵重戰必當千
席間莫訝賡酬速詩債從來笑隔年

陳氏得開元佛殿梁材斲為琴傳三世矣而歸

於太常少卿盛誨之請予賦焉

佛屋良材度中琴調絃安軫布徽金平時已入棟梁用
終古更傳山水音陳氏得為三世寶啓期無負一生心
太常密補巖廊化歌詠南風惠澤深

畫錦堂

功成身退正康強
憑軾歸來畫錦光
門外節旄交畫戟
境中桑梓間甘棠
兩朝將相經綸業
千古絃歌禮義鄉
父老未勞思再見
聖君方眷股肱良

遊藉田

池館連雲畫掩扉
晴煙冉冉日暉暉
黃鸝映葉不肯去
翠鳥得魚還自飛
禾秀天田蔥蒨卧
花開仙苑粉牆圍
白蓮徑裏歸來晚
風送餘香欲染衣

和酬赤松莊陳天貺

花壓欄干木插天不知經始自何年為憐水石留終日
謾拂莓苔寫數篇籠碧裁紗非我望梯雲名集自家傳
氣蒸波撼多才思應笑襄陽孟浩然

過鴻溝

楚漢區區別土疆誰知盛德勝兵強乾坤混一歸真主
郡國平分亦假王地底泉源通汜水道旁碑石屬滎陽
如今四海都無外農入春田失戰場

和謝聖藻遊錦川

錦川亭上雨霏微
太守齋航卷畫旂
步入名園鶯慣見
歌隨流水鶯驚飛
凭高自有千峯聚
飲劇方知萬事非
卻恐丹陽赴官去
此心當共白雲歸

藉田集議

以姓為韻

甸師經始遇金穰
禁蘩清樽合奉常
千畝方田開帝籍
四時和氣聚神倉
青壇改卜先農兆
曲水交流上巳觴
欲識漢家林苑富
融融春澤浸長楊

舟泊太湖

區區朝市逐紛華不信湖心有海槎
八十丈虹寒卧影一千頃玉碧無瑕
古今風月歸詩客多少尊鱸屬酒家
安得扁舟如范蠡煙波深處卜生涯

汝直松齋

伊闕十五里唐朝三百年歲寒林木在
王氏子孫傳門有登龍客風生飲虎泉
丹方齊代刻龕像魏時鑄居士山長對
郎君谷已遷塔魏花繚繞溪淨竹嬋娟
木記空

陳迹烽臺息舊煙
陸渾平獷俗八節穩
漁船嗣絕傷宮
傳碑亡歎鄭虔石樓延客醉天竺伴僧禪
寓目鳴鑾地
追懷奪錦篇白雲最深處約我詠歸田

默齋

喧喧人世事何窮
燕坐深齋孰與同道義優游言象外
利名分付是非中
紅塵無路到真境
幽鳥有時啼晚風
此意只應陶令會
北窓琴在七絃空

贈馮揚州

天下無雙士淮南第一州文章老元帥節義古諸侯路
穩歸黃閣功成建碧油九重致堯舜四海望伊周楚甸
供吟筆吳兵賴坐籌風雲生鷁首蛟蜃怯龍頭有士依
餘光干時愧拙謀滄溟波浪險願借釣鼇鉤

上知郡宋大卿

縣弩曾陪竹馬迎清風千里畏神明三朝史策推循吏
九寺官班重正卿道氣養成髭轉黑民情照盡法從輕
異時歸去黃金闕留得甘棠歲歲榮

答宗臣佳章

幽閒外世緣白日抱琴眠詩就多驚俗樓居半是仙竹
牀斜倚杖蘚壁倒垂鞭翻笑紅塵客馬頭韁轡牽

和劉景文路分成考

新春書一考舊學惜三餘弗厭詩情淡從教世味疎清
時閒將帥長日玩圖書愛我錦溪月約來相伴居

和李義山盤豆館藁蘆有感

盤豆蒼珉刻舊吟清風自可滌煩襟庭蘆邂逅開青眼

澤國歸投是素心鄉夢不知家遠近世塗休問迹升沈
陽春一曲一樽酒遮莫秋聲四面砧

秀溪寒食

十里喧闐錦繡川鞦韆人健趁飛鳶花明柳暗丹青國
日薄雲濃水墨天遊女踐成芳草徑畫船衝散碧溪煙
武陵謾說桃源好屈指如今幾百年

夜泊偶書

過得重湖日已斜相依漁艇宿蒹葭故園水面一千里

明月渡頭三四家客路漂流身似梗世途紛冗事如麻
卻欣歸去逢寒食醉倒春風爛漫花

和錢越州穆贈惠州弟

燕集蓬山雨過涼湖光何獨負知章萬家桃李春風國
兩郡旌旄畫錦鄉和樂豈煩鳴管磬醺酣非止為杯觴
遙應大庾嶺頭去南北枝間梅子黃

和酥花二章

姑射山中冰雪膚造花憑仗著頭酥生成自有神仙術

點化亦同天地爐全用陰功催氣候不從凡土起根株
頓教寒處萌春物鄒律回陽得似無

一盤花卉闢工夫孰謂真酥勝假酥白石萌芽生玉種
寒林枝幹守丹爐縷金滴粉休隨俗翦綵粘膏近守株
翻憶嶺頭梅帶雪使歸曾得信音無

趙左丞畫像

洪學祠堂寫六賢左丞功業最居先儀形已在凌煙閣
豈獨丹青一郡傳

魏徵君贊

天子詔不起少微星轉明寥寥千載後富貴在清名

趙賓客生日

人間爵祿頌公難自有家傳一品官
己亥年生逢己亥從今甲子別開端

老子度關圖送張會稽為壽

秘藏函谷關中子持贈蓬萊閣上仙
願得髭鬚如此老却教龜鶴羨長年

無為子六年官太常江上耆老思得一見門人
求京師名筆傳寫以歸因題之云

江南江壯白雲堆試共幽人一展開向道無為老居士
擬歸先遣化身來

申國呂公挽詞

訃聞孰不淚盈巾寶鑑云亡社稷臣帝獵渭濱先得呂
神還崧嶽舊生申默調一氣歸元鼎坐致羣倫入大鈞
孤賤無能報知遇文章曾許繼前人

資政少保章簡公挽詞

中道立不倚大哉王者言文章曾潤色功業在調元
衮繡光閭里圖書遺子孫悲風起吳國千載鳳凰原

得安肅顏舅書再成哀詞

安肅書來倍痛傷痛傷窮苦盛時亡三千蟬蛻人何處
十載龍山夢一場我愧動心非孟子誰能鼓缶學蒙莊
夜臺難寄登科信淚滴春衫弔夕陽

天章俞待制挽詩三首

材與時相會聲華孰可攀東堂升祕籍內閣叙清班餘
慶千年遠浮生一夢還故鄉聞計日雲黯四明山

熙寧治百川獻議闢民田平昔不毛地于今大有年至
忠期報國上策在安邊士論追賢業臨風一泣然

節制當方面恩威號令明黠羌知効順叛俗乞歸耕一
夕流星隕中年逝水傾祠堂嚴歲享耆舊致精誠

無為集卷六